

■ CONVIVENZA

In pèr receipts per Giganto

DA VIOLA PFEIFFER*

Gia Giacun Hasper Muoth enconuscheva il struggle da chattar ina dunna «sco s'auda». Il 1886 ha el scrit en sia idilla «il Gioder» con grev ch'igl è da chattar ina «dunna de noblas vertits e stupenta casrina – e surtut in ver ideal en fatgs da cuschina». E vi da quest struggle n'ha para betg midà la massa dapi il 1886, sco quai ch'jau hai badà da curt.

L'entschatta da favrer è il nov album dal rappunz Giganto cumparì e cun quel er l'opus delicti, la chanzun «Ina», ina chanzun che Giganto sto avair scrit en la tradiziun da Muoth – auter n'è quest fenomen betg explitgabel.

El ha numnadamain da cumbatter cun exact ils medems problems sco il Gioder avant passa 120 onns: Giganto tschertga «ina dunna da cheusi, negina dil marcau, na no schicki micki», perquai che lezazas «san matei buc cuschinar – na», ed uschia less el «ina dils cuolms sc'ina enziana». Dal tutfatg cumparegliabel cun Muoth, era sche la metrica è tar lez forsa in pau pli elavurada.

Bun. Jau na sai gea betg co che quai è stà tar Giganto, ma ozendi han per il solit tuts, giuvens e giuvnas, il rom cuschinar



en scola. Ed era sche betg, l'internet è plain da bunas paginas cun receipts e tips e trics – era per principiants: chefkoch.de, fooby.ch, bettybossi.ch, guetekueche.ch, per mo numnar intginas. Sin l'ultima chattas era receipts per capuns, bizochels e schizunt per maluns. Simplamain empruvar, nagina tema! Lura n'è ins era betg dependent d'ina cuschiniera. Murir da la fom na sto pia nagin.

Plinavant saja tschentà la dumonda sche propi tut las dunnas dals culms san cuschinar, sche gia il Gioder aveva tals problems cun chattar ina, e lez ha tschertgà trais emnas en l'entira Cadi! Ma il crass è gea atgnamain insatge auter, numnadamain il fatg ch'il maletg da la dunna dal rappunz Giganto è para anc adina il medem sco tar Muoth. Ferm tubac, era sch'ins sa che la scena da hip-hop n'è betg exnumada per ses senn d'egualità ed avertadad.

Dentant na spetga Muoth natiralmain betg che las dunnas s'inamureschian mo simplamain uschia en ses Gioder: El saja stà bel e grond e pulit e perdert e natiralmain era ritg. Ma era Giganto ha ses arguments per persvader la dunna desiderada, el porscha «amur da qualità». Cleramain irresistibel, ma sch'i basta era da persvader «in'enziana»?

Tar questas premissas na fai natiralmain era betg surstar ch'il Gioder chatta la fin finala ina dunna adeguata: «Mumma, jeu vegn, jeu hai enflau ina dunna de casa, / Ina, che sa cuschanar sco ti, che fila, che teissa, / Possi in auter portar il tshupi dil sogn purschalladi.»

Jau na less qua ussa betg discurrer dad Ödipus u Freud, ma ch'il Gioder avess il pli gugent maridà sia mamma para evident. E quai regorda bain er in pau vi d'in'otra chanzun rumantscha, u betg? «Hey mumma, ti eis la megliaera, la megliaera dunna ch'i dat. Jeu less dir zatgei, dir ch'jeu carezel tei, ch'jeu carezel tei, jeu carezel tei, sur tut...» Tgi sa da tgi che questa chanzun è pomai?

*** Viola Pfeiffer ha studegià germanistica, istorgia e rumantsch a l'Università da Turitg. Mintgatant lavura ella vi da sia dissertaziun e mintgatant sco scolasta, ma bunamain adina scriva ella.**